



Kitaani sinerissatsinni qassutikut qallorneqarnissaannut suliniutissatut pilersaarummik UKA2019-mut Naalackersuisut peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Aqqaluaq B. Egede, Inuit Ataqtigiit)
(Siullermeerneqarnera)

Demokraatini Inatsisartunut ilaasortaq Aqqaluaq B. Egede, Inuit Ataqtigiit manna siunnersuutitsialak pillugu qutsavigerusupparput.

Pinngortitami atorunnaarnikunik qassuterpassuaqarpoq. Aamma qassutikorsuarnik pinngortitamittoqaqaaq uumasunut arlalinnut akorngutaasumik.

Kialluunniit assortorsinnaangilaa piniutit atorunnaakkat eqqarnissaat piginnittut akisussaaffigimmassuk. Kisianni ajoraluartumik piniutinut piginnittut piniutitik atorunnaakkatik tunniussivissaannut agguinneq ajorpaat imaluunniit aamma imaassinnaavoq piniutit piniarani katanneqarsimasut. Taamaallaat paasiinnartariaqarparput qassutikut ajornartorsiutaanerat alliaruinnavimmat.

Taamaattumik allatut ajornartumik iliuuseqartariaqarpugut.

Demokraatini avatangiisinut aningaasaateqarfimmik pilersitsinissaq tunngaviusumik illersornikuuarput illersorlugulu. 2018-mi Ukiakkut ataatsimiinnermi aalajangerneq tamanna pivoq. Avatangiinut Aningaasaateqarfimmik pilersitsinerup siunertaraa inuit atugaat ataqqillugit aamma uummasut naasullu piunnarnissaat ataqqillugu piujuaannartitsineq tunngavigalugu inuiaqtigiinnik ineriartortitsinissap nukittorsarnissaa.

Siunnersuutip matuma Naalackersuisullu akissutaata takutippaap avatangiisinut aningaasaateqarfimmik pilersinerup qassutikunik ajornartorsiuteqarneq iluarsivigisinnaangikkaa.

Amerlanerusunik iliuuseqartariaqarpugut aamma ataatsimoortunik aaqqiissutissanik nassaartariaqarpugut piniutikut pinngortitamik mingutsitsinerat akiussagutsigu.

Qaammarsaaneq pisariaqarpoq pissusitoqqat allangortinneqassappata aamma peqataanik suliniartoqartariaqarpoq iliuuseqartoqarlunilu pinngortitap piniutikunit mingutsinneqarnera akiorneqassappat aamma qassutikut mingutsitsinerat.

Kiammi takusimangilaa piniarfinni mingutsitsisoqarsimasoq, tamakkunani qimaannarneqartarmata tupikut, sinngup puui, aallaasikut il.il. piginnittut piniarfimmu qimaannarsimasaat. Tamakku pinaveersaartitsilluta suliniarnitsinnut aamma ilannguttariaqarpagut taamatullu piniarfinni piniutikunik saliinissaq.

Ataatsimoortumik iluarsivissutissat pisariaqartippagut Kalaallit Nunaannut tamarmut atuuttut sumiiffiit



ilaannaannuunngitsoq imaluunniit piniariaatsinut aalajangersimasuinnarnut. Atorfissaqartipparput piniutunik atuinerup illersorneqarsinnaasumik pisarnissaa, inuiaqatigiit iliuusissanut suliniutissanullu isummersimanerat tunngavigalugu aamma Kalaallit Nunaat tamakkerlugu atuuttussanngortinneqarsimasut tunngavigalugit.

Taamaattumik Demokraatini imaattumik allannguutissamik siunnersuuteqarusuppugut:

"Kalaallit Nunaanni pinngortitamut piniutikunik maanngaannaq qimatsisarnerup pinaveersaartinnissaanut kiisalu piniutikunik katersinissamut suliniutissatut pilersaarummik UKA2019-mut Naalakkersuisut peqquneqarnissaannik Inatsisartut aalajangiiffigisassaattut siunnersuut."

Taamatut allannguutissamik siunnersuuteqarluta Demokraatini siunnersuut suliareqqitassanngorlugu ataatsimiititaliamut ingerlateqqipparput. Saliinerup annertussusissaata allaaserinissaanut suliniutissanut pilersaarusionerq aallarniutaassaaq tassunga ilanngunneqarsimassalluni saliinermut atatillugu inuiaqatigiit aningaasartuutigiumaagassaat.